



11

保 4
5983
10-6



門保4
號 5983
卷 10-6

西漢會要卷三十四

宋 徐 天 麟 撰

職官四

封建

封功臣

漢興自秦二世元年之秋楚陳之歲初以沛公總帥
雄俊三年然後西滅秦立漢王之號五年東克項羽
即皇帝位八載而天下乃平始論功而定封訖十二
年侯者百四十有三人時大城名都民人散亡戶口
可得而數裁什二三是以大侯不過萬家小者五六



百戶封爵之誓曰使黃河如帶泰山若厲國以永存

爰及苗裔於是申以丹書之信重以白馬之盟又作

十八侯之位次孟康曰唯作元功蕭曹等十八人位次耳高后乃詔作位次下竟師古曰

謂蕭何曹參張敖周勃樊噲酈商奚涓夏侯嬰灌嬰傅寬靳歙王陵陳武王吸薛歐周昌丁復蟲達從弟

一至十八也高后二年復詔丞相陳平盡差列侯之功錄

第下竟藏諸宗廟副在有司始未嘗不欲固根本而

枝葉稍落也逮文景四五世間流民既歸戶口亦息

列侯大者至三四萬戶小國自倍富厚如之子孫驕

逸亡其先祖之艱難多陷法禁隕命亡國或云子孫

訖于孝武後元之年靡有孑遺耗矣罔亦少密焉故

孝宣皇帝愍而錄之乃開廟藏覽舊籍詔令有司求

其子孫咸出庸保之中並受復除或加以金帛用章

中興之德降及孝成復加卹問稍益衰微不絕如綫

善乎杜業之納說也曰昔唐以萬國致時雍之政虞

夏以之多羣后饗共已之治湯法三聖殷氏太平周

封八百重譯來賀是以內恕之君樂繼絕世隆名之

主安立亡國至於不及下車德念深矣成王察牧野

之克顧羣后之勤知其恩結於民心功光于王府也

故追述先父之志錄遺老之策高其位大其寓愛敬

飭盡命賜備厚大孝之隆於是為至至其沒也世主

歎其功無民而不思所息之樹且猶不伐況其廟乎
是以燕齊之祀與周並傳子繼弟及厯載不墮豈無
刑辟繇祖之竭力故支庶賴焉迹漢功臣亦皆割符
世爵受山河之誓存以著其號亡以顯其魂賞亦不
細矣百餘年間而襲封者盡或絕失姓或乏無主朽
骨孤於墓苗裔流於道生爲愍隸死爲轉屍以往況
今甚可悲傷聖朝憐閔詔求其後四方忻忻靡不歸
心出入數年而不省察恐議者不思大義設言虛亡
則厚德掩息遊東布章非所以視化勸後也三人爲
眾雖難盡繼宜從尤功於是成帝復紹蕭何哀平之

世增修曹參周勃之屬得其宜矣以綴續前記究其
本末并序位次盡于孝文以昭元功之侯籍功臣表

高帝與功臣剖符作誓丹書鐵契金匱石室藏之宗
廟列侯畢已受封奏位次皆曰平陽侯曹參功最多
宜第一然上心欲何爲第一鄂千秋曰蕭何當第一
參次之上乃令何第一蕭何傳

十二年詔曰吾立爲天子帝有天下十二年于今矣
與天下之豪士共定天下同安輯之其有功者上致
之王次爲列侯下乃食邑而重臣之親或爲列侯皆
令自致吏得賦斂女子公主爲列侯食邑者皆佩之

印賜大第室吏二千石徙之長安受小第室入蜀漢
定三秦者皆世世復吾于天下功臣可謂亡負矣云

云本紀

高后二年詔曰高皇帝匡飭天下諸有功者皆受分
地爲列侯朕思念至于久遠而功名不著亡以尊大
誼施後世今欲差次列侯功以定朝位藏于高廟世
世勿絕嗣子各襲其功位其與列侯議定奏之丞相
臣平言謹與絳侯臣勃曲周侯臣商頴陰侯臣嬰安
國侯臣陵等議列侯幸得賜餐錢奉邑陛下加惠臣
功次定朝位臣請藏高廟奏可本紀

封外戚

高后欲立諸呂爲王問王陵陵曰高皇帝刑白馬而
盟曰非劉氏而王者天下共擊之今王呂氏非約也
太后不說問左丞相平及絳侯周勃等皆曰高帝定
天下王子弟今太后稱制欲王昆弟諸呂無所不可
太后喜罷朝陵責平勃曰始與高帝啖血而盟諸君
不在邪今高帝崩太后女主欲王呂氏諸君縱欲阿
意背約何面目見高帝于地下乎平曰于面折廷爭
臣不如君全社稷安劉氏後君亦不如臣陵無以應
之王陵傳

周亞夫爲丞相竇太后曰皇后兄王信可侯也上曰

始南皮及章武先帝不侯

師古曰南皮竇彭祖太后弟長君之子章武太后母

及臣卽位乃侯之信未得封也竇太后曰人生

各以時行耳竇長君在時不得侯死後乃其子彭祖

顧得侯吾甚恨之帝趣侯信也上曰請得與丞相計

之亞夫曰高帝約非劉氏不得王非有功不得侯不

如約天下共擊之今信雖皇后兄無功侯之非約也

上默然而沮

周亞夫傳

漢興外戚與定天下侯者二人故誓曰非劉氏不王

若有亡功非上所置而侯者天下共誅之是以高后

欲王諸呂王陵廷爭孝景將侯王氏修侯犯色卒用

廢黜是後薄昭竇嬰上官衛霍之侯以功受爵其餘

后父據春秋褒紀之義帝舅緣大雅申伯之意寢廣

博矣

外戚恩澤表

成帝河平二年六月悉封諸舅王譚爲平阿侯商爲

成都侯立爲紅陽侯逢時爲高平侯五人同日封故

世謂之五侯太后母李氏更嫁爲河內苟賓妻生子

參太后欲田蚡爲比而封之上曰封田氏非正也以

參爲侍中水衡都尉

元后傳

哀帝欲封祖母傳太后從弟商鄭崇諫曰孝成皇帝

封親舅五侯天爲赤黃晝皆日中有黑氣今祖母從
昆弟二人已侯孔鄉侯皇后父高武侯以三公封尙
有因緣今無故欲復封商壞亂制度逆天人心非傅
氏之福也臣聞師曰逆陽者厥極弱逆陰者厥極凶
短折犯人者有亂亡之患犯神者有疾天之禍故周
公著戒曰惟王不知艱難唯耽樂是從時亦罔有克
壽故衰世之君夭折蚤沒此皆犯陰之害也臣願以
身命當國咎崇因持詔書案起傅太后大怒曰何有
爲天子乃反爲一臣所顛制邪上遂下詔曰朕幼而
孤皇太后躬自養育免于襁褓教道以禮至于成

人惠澤茂焉欲報之德嗥天罔極前追號皇太太后
父爲崇祖侯惟念德報未殊朕甚而焉侍中光祿大
夫商皇太后父同產子小白保大恩義最親其封
商爲汝昌侯爲崇祖侯後更號崇祖侯爲汝昌哀侯
鄭崇傳

封丞相

元朔中公孫宏代薛澤爲丞相先是漢常以列侯爲
丞相唯宏無爵上于是下詔曰朕嘉先聖之道開廣
門路官招四方之士蓋古者任賢而序位量能以授
官勞大者厥祿厚德盛者獲爵尊故武功以顯重而

文德以行褒其以高成之平津鄉戶六百五十封丞相宏為平津侯其後以為故事至丞相封自宏始也

本傳

孝武元功宿將略盡會上亦與文學進拔幽隱公孫宏自海瀕而登宰相于是寵以列侯之爵自是之後

宰相畢侯矣

恩澤侯表

朱博為丞相封陽鄉侯食邑二千戶上書曰故事封

丞相不滿千戶而臣過制願還千戶

本傳

平當為御史大夫至丞相以冬月賜爵關內侯

本傳漢儀

注御史大夫為丞相更春乃封李奇日以冬月非封侯時

遣列侯就國

文帝二年十月詔曰朕聞古者諸侯建國千餘各守

其地以時入貢民不勞苦上下驩欣靡有違德今列

侯多居長安邑遠吏卒給輸費苦而列侯亦無繇教

訓其民其令列侯之國為吏及詔所止者遣太子

本紀

下同

三年十一月詔曰前日詔遣列侯之國辭未行丞相

朕之所重其為朕率列侯之國遂免丞相勃遣就國

景帝二年十月省徹侯之國

晉灼曰文帝遣列侯之國今省之

繼絕世

西漢書卷之三十四
高帝五年下令曰楚地已定義帝亡後欲存恤楚眾

以定其主齊王信習楚風俗更立為楚王本紀

孝文元年更封蕭延為鄼侯

功臣表

孝景二年封故相國蕭何孫係為列侯

中元元年封故御史大夫周苛周昌孫子為列侯

孝武元光三年封高祖功臣五人後為列侯

元狩三年封故相國蕭何曾孫慶為列侯

孝宣地節二年詔大司馬大將軍博陵侯功德茂盛

朕甚嘉之復其後世疇其爵邑世世毋有所與功如

蕭相國

地節四年封故鄼侯蕭何曾孫建世為侯

元康元年復高皇帝功臣絳侯周勃等百三十六人

家子孫令奉祭祀世世勿絕其毋嗣者復其次並本紀

功臣子孫訖于孝武後元之年靡有子遺耗矣故孝

宣皇帝愍而錄之乃開廟藏覽舊籍詔令有司求其

子孫咸出庸保之中並受復除或加以金帛用章中

興之德降及孝成復加卹問稍益衰微不絕如綫杜

業納說曰內恕之君樂繼絕世隆名之主安立亡國

迹漢功臣亦皆割符世爵受山河之誓存以著其號

亡以顯其魂賞亦不細矣百餘年間而襲封者盡或

絕失姓或乏無主朽骨孤于墓苗裔流于道生為愍
隸死為轉屍以往況今甚可悲傷聖朝憐憫詔求其
後四方忻忻靡不歸心出入數年而不省察恐議者
不思大義設言虛亡則厚德掩息遊東布章非所以
視化勸後也三人為眾雖難盡繼宜從尤功于是成
帝復紹蕭何哀平之世增修曹參周勃之屬得其宜
矣功臣表

元康四年賜故右扶風尹翁歸子黃金百斤以奉其
祭祀又賜功臣適後黃金人二十斤本紀

成帝元延元年封蕭相國後喜為鄼侯本紀

孝平元始二年封故大司馬博陸侯霍光從父昆弟

曾孫陽宣平侯張敖元孫慶忌周勃元孫共按本傳元孫

之子舞陽侯樊噲元孫之子章皆為列侯復爵賜故

恭曲周侯酈商等後元孫酈明友等百一十三人爵關

內侯食邑各有差本紀

元始中太皇太后詔賜公孫宏後子孫之次當為後

者爵關內侯徵詣公車上名尚書朕親臨拜焉史記公孫

宏傳

王四夷君長

高帝五年詔曰故粵王亡諸世奉粵祀秦侵奪其地

使其社稷不得血食諸侯伐秦亡諸身帥閩中兵以
佐滅秦項羽廢而弗立今以為閩粵王王閩中地勿
使失職本紀

十一年五月詔曰粵人之俗好相攻擊前時秦徙中
縣之民南方三郡使與百粵雜處會天下誅秦南海
尉它居南方長治之甚有文理中縣人以故不耗滅
粵人相攻擊之俗益止俱賴其力今立它為南粵王
使陸賈即授璽綬它稽首稱臣本紀

十二年詔曰南武侯織亦粵之世也立以為南海王本紀

孝惠三年舉高帝時粵功曰閩君搖功多其民便附
乃立搖為東海王都東甌世號曰東甌王閩粵傳

武帝建元四年南粵王胡遣太子嬰齊入宿衛元鼎
四年上書請比內諸侯三歲一朝除邊關於是天子
許之賜其丞相呂嘉銀印及中尉太傅印餘得自置
本傳

建元六年閩粵王郢攻南粵粵人殺郢降天子曰郢
等首惡獨無諸孫繇君丑不與謀乃使郎中將立丑
為粵繇王奉閩粵祭祀本傳

孝昭始元六年詔曰鉤町侯母波率其君長人民擊

反者斬首捕虜有功其立母波為鈎町王本紀

匈奴故印文曰匈奴單于璽本傳王莽更曰新匈奴單于章

西南夷君長以百人越本作數謝本作入獨夜郎滇受王印本傳

傅介子斬樓蘭王馳傳詣闕乃立王弟尉屠耆為王

更名其國為鄯善為刻印章賜以宮女為夫人西域傳

關都尉文忠攻罽賓殺其王立陰未赴為罽賓王同上

西域凡國五十白譯長城長君監吏大祿百長千長

都尉且渠當戶將相至侯王皆佩漢印綬凡三百七

十六人本傳

侯降虜

昔書稱蠻夷帥服詩云徐方既徠春秋列潞子之爵

許其慕諸夏也漢興至于孝文時乃有弓高襄城之

封雖曰外徠本功臣後故至孝景始欲侯降者丞相

周亞夫守約而爭帝黜其議初開封賞之科功臣表下

匈奴王徐盧等五人降漢師古曰功臣表曰睢徐盧上欲侯之以

勸後亞夫曰彼背其主降陛下陛下侯之即何以責

人臣不守節者乎上曰丞相議不可用乃悉封徐盧

等為列侯周亞夫傳

封方士

欒大見武帝言黃金可成而河決可塞不死之藥可

得僊人可致也上乃拜大為五利將軍居月餘得四
印得天士將軍地士將軍大通將軍詔以二千戶封
地士將軍大為樂通侯賜列侯甲第郊祀志

婦人爵邑

高帝封兄伯妻為陰安侯文紀蘇林曰高帝兄伯妻羹頡侯母邱嫂也

高后二年封蕭何夫人為鄼侯蕭何傳

樊噲妻呂頹為臨光侯樊噲傳

列侯太夫人夫人文紀七年如淳曰列侯之妻稱夫人子不為列侯不得稱也

孝文十二年賜諸侯王女邑各二千戶本紀

武帝尊王皇后母臧兒為平原君外戚傳

王皇后前夫金氏女封脩成君賜湯沐邑同上

宣帝地節四年賜外祖母號為博平君以博平蠶吾

兩縣戶萬一千為湯沐邑王夫人傳

金當上南大行為太夫人金日磾傳文頡曰南當母名也上名狀于大行

王莽母賜號曰功顯君王莽傳

平帝賜三妹謁臣號脩義君哉皮為承禮君鬲子為

尊德君食邑各二千戶衛姬傳按本紀云賜帝女弟四人號皆為君今傳云三妹

與紀不同當考

王莽白尊太后姊妹君俠為廣恩君君力為廣惠君

君弟為廣施君皆食湯沐邑元后傳

封建雜錄

列侯所食縣曰國百官表

高帝十二年詔列侯皆令自致吏得賦斂女子公主

為列侯食邑者佩之印賜大第室本紀

列侯賜餐錢奉邑呂后紀應劭曰諸侯四時皆得賜餐錢

秦漢之制列侯封君食租稅歲率戶二百千戶之君

則二十萬朝覲聘享出其中貨殖傳

孝武元鼎五年九月列侯坐獻黃金酎祭宗廟不如

法奪爵者百六人本紀漢儀注云諸侯歲以戶口酎黃金於高廟

孝宣地節四年襄隄侯聖坐酎金斤八兩少四兩免

五鳳四年朝節侯固城坐酎金少四兩免楊邱侯偃

坐出國界削為司寇列侯坐罪奪爵者多矣略舉數條以為例以上並見王子侯表

終陵侯華祿坐出界耐為司寇功臣表

祚陽侯仁坐擅興繇賦削爵一級此類甚多皆不具載

孝景中二年合列侯初封及之國大鴻臚奏策列侯

薨葬國得發民輓喪穿復土治墳無過三百人畢事

本紀

西漢會要卷三十四

西漢會要卷三十五

宋 徐 天 麟 撰

職官五

加官

侍中左右曹諸吏散騎中常侍皆加官所加或列侯將軍卿大夫將都尉尚書太醫太官令至郎中亡員多至數十人侍中中常侍得入禁中諸曹受尚書事諸吏得舉法散騎騎並乘輿車給事中亦加官所加或大夫博士議郎掌顧問應對位次中常侍中黃門有給事黃門位從將大夫皆秦制

百官表

西域都護加官

見三十二卷
西域都護條

爵

爵一級曰公士二上造三簪袅四不更五大夫六官大夫七公大夫八公乘九五大夫十左庶長十一右庶長十二左更十三中更十四右更十五少上造十六大上造十七駟車庶長十八大庶長十九關內侯二十徹侯皆秦制以賞功勞徹侯金印紫綬避武帝諱曰通侯或曰列侯改所食國令長名相又有家丞門大夫庶子百官表

高帝五年詔曰軍吏卒會赦其七大夫以上師古曰七大夫

公大皆令食邑非七大夫以下皆復其身及戶勿事

本紀下同

又曰七大夫公乘以上皆高爵也爵或人君上所尊禮異日秦民爵公大夫以上令丞與亢禮今吾於爵非輕也且法以有功勞行田宅其令諸吏善遇高爵稱吾意且廉問有不如吾詔者以重論之

八年令爵非公乘以上毋得冠劉氏冠

孝惠卽位爵五大夫以上有罪當盜械者皆頌繫上造以上當刑及當為城旦舂者皆耐為鬼薪白粲武帝時民多買復及五大夫千夫於是除千夫五大

夫為吏食貨志

舊爵

上聞

古爵呂氏春秋曰天子賞魏文侯以上聞晉灼曰名通於天子也

樊噲自公大夫賜上聞爵本傳

執帛

鄭氏曰楚爵也張晏曰孤卿也

曹參自五大夫封執帛號建成君本傳

夏侯嬰賜爵七大夫賜爵五大夫賜爵執帛本傳

執珪

如淳曰呂氏春秋得伍員者位執珪古爵名也張晏曰侯伯執珪以朝位比之

夏侯嬰賜爵執帛賜爵執珪賜爵封本傳

曹參封執帛遷為執珪封建成侯本傳

卿

樊噲賜爵五大夫賜爵卿本傳

傅寬賜爵卿本傳

封君賜重封

叔孫通號稷嗣吾本傳下同

婁敬號曰奉春君

侯公平國君高紀

曹參自五大夫封執帛號建成君本傳下同

樊噲賜爵封號賢成君破南陽賜重封

傅寬賜爵卿封號共德君

孔霸以帝師賜爵號褒成君孔光傳

武功爵

武帝元朔六年詔曰日者大將軍巡朔方征匈奴斬首虜萬八千級諸禁錮及有過者咸蒙厚賞得免減罪今大將軍仍復克獲斬首虜萬九千級受爵賞而欲移賣者無所流貶其議為令有司奏請置武功賞

官以寵戰士紀本

武功爵臣瓚曰茂陵中書有武功爵一級曰造士二級曰官首六級曰乘鐸七級曰千夫八級曰樂卿九級曰執戎十級曰政戾庶長十一級曰軍衛此武帝所制以寵軍功師古曰此下云級十七萬凡直三十餘萬金今瓚所引茂陵中書止於十一級則計數不

足與本文乖矣或者茂陵書說之不盡也級十七萬凡直三十餘萬金諸買武功爵官首者試補吏先除千夫如五大夫其有罪又減二等爵得至樂卿以顯軍功軍功多用超等大者封侯卿大夫小者郎食貨志

賜爵

立漢社稷

高帝二年令民立漢社稷施恩德賜民爵紀本

即位

孝惠即位賜民爵一級中郎郎中滿六歲爵二級四歲二級外郎滿六歲二級中郎不滿一歲一級

宦官尚食比郎中太子御驂乘賜爵五大夫舍人

滿五歲二級紀本

立皇太子

孝文元年建太子因賜天下民當為父後者爵一

級紀本

王皇子

孝景三年立皇子為王賜民爵一級紀本

皇太子冠

孝景後三年皇太子冠賜民為父後者爵一級紀本

改元

孝景中元年赦天下賜民爵一級紀本

後元年赦天下賜民爵一級中二千石諸侯相爵

右庶長紀本

征伐

高帝五年詔曰軍吏卒會赦其亡罪而亡爵及不

滿大夫者皆賜爵為大夫故大夫以上賜爵各一

級其七大夫以上皆令食邑紀本

力役

孝惠五年長安城成賜民爵戶一級紀本

募民徙塞

西漢書卷三十五
五
鼂錯言守邊備塞事曰募輸奴婢欲以拜爵者不足乃募民之欲往者皆賜高爵復其家郡縣之民得買其爵以增至卿上從其言募民徙塞下本傳

郊祀

孝武元鼎四年行幸雍祠五時賜民爵一級女子

百戶牛酒本紀

祥瑞

孝宣本始元年鳳皇集膠東千乘賜吏二千石諸侯相下至中都官宦吏六百石爵各有差自左更至五大夫賜天下人爵一級孝者二級本紀

帝加元服

孝昭元鳳四年帝加元服賜中二千石以下及天

下民爵本紀

尊廟號

孝宣本始二年尊孝武廟為世宗廟巡狩所幸之

郡國皆立廟賜民爵一級本紀

褒吏治

孝宣神爵四年潁川太守黃霸以治行賜爵及潁川吏民有行義者爵人二級力田一級貞婦順女

帛本紀

災異

孝元永光二年詔陰陽不調三光晦昧其大赦天

下賜民爵一級吏六百石以上爵五大夫勤事吏

各三級紀本

匈奴朝

孝成河平四年匈奴來朝赦天下徒賜孝弟力田

爵二級紀本

賜民爵高紀臣瓚曰民賜爵罪得以減也

賜民爵戶一級師古曰家長受也惠紀下同

賜天下民當為父後者爵一級師古曰雖非己生正嫡但為後者即得賜

爵

孝惠六年夏旱令民得賣爵

元光元年賜民長子爵一級武紀

鬻爵

孝惠元年民有罪得賣爵三十級以免死罪應劭曰一級直

錢二千凡為六萬見本紀

鼂錯說上曰今募天下入粟縣官得以拜爵得以除

罪入粟受爵至五大夫以上乃復一人耳於是文帝

從錯之言令民入粟邊六百石爵上造稍增至四千

石為五大夫萬二千石為大庶長各以多少級數有

差食貨志

又言募民徙塞事募不足募輸奴婢欲以拜爵者上

從其言量錯傳

景帝上郡以西旱復修賣爵令而裁其賈以招民食貨志

武帝時兵革數動民多買復及五大夫千夫調發之

士益鮮於是除五大夫千夫為吏同上

孝成鴻嘉三年令吏民得買爵賈級千錢本紀

永始二年詔曰關東比歲不登吏民以義收食貧民入穀物助縣官振贍者已賜直其百萬以上加賜爵

右更欲為吏補三百石其吏也遷二二三等二十萬以上賜爵五大夫吏亦遷二二等民補郎本紀

西漢會要卷三十五

西漢會要卷三十六

宋 徐 天 麟 撰

職官六

特進

王譚位特進領城門兵外戚傳按漢雜事諸侯功德優盛朝廷所敬異者賜位特進

王商位特進領城門兵置幕府得舉吏如將軍元后傳

傅喜位特進奉朝請

薛宣加寵特進位次師安昌侯給事中視尚書事

張禹以列侯朝朔望位特進見禮如丞相置從事史

五人並本傳

領尚書事

霍光以大將軍領尚書事

張安世以車騎將軍領尚書事又以衛將軍領尚書事

師丹以左將軍領尚書事

蕭望之以前將軍領尚書事並本傳

王鳳以大司馬領尚書事元后傳

鄭寬中以光祿大夫領尚書事張山拊傳

孔光以光祿勳領尚書事

張禹以光祿大夫領尚書事

霍山以奉車都尉領尚書事

周堪以光祿大夫領尚書事並本傳

車騎將軍王音內領尚書外典兵馬母將隆傳

史高以外屬為大司馬車騎將軍領尚書事匡衡傳

平尚書事

于定國以光祿大夫平尚書事

張敞以中大夫平尚書事並本傳

領他官

桑宏羊為治粟都尉領大農食貨志

東邪咸陽孔僅為大農丞領鹽鐵事食貨志

霍山奉車都尉侍中領胡越兵霍光傳

孔光為帝太傅領宿衛本傳

王譚王商位特進領城門兵元后傳

金涉為侍中騎都尉領三輔胡越騎金日磾傳

鍾元為尚書令領廷尉何並傳

劉向以故九卿召拜為郎中領護三輔都水

息夫躬以左曹光祿大夫使持節領護三輔都水

馬參為諫大夫領護左馮翊都水

劉向為光祿大夫領校中五經秘書

劉歆河平中受詔與父向領校秘書本傳

兼官

張安世車騎將軍光祿勳又遷右將軍光祿勳霍光傳

宣帝徙度遼將軍未央衛尉范明友為光祿勳霍光傳

宣帝拜蕭望之為前將軍光祿勳

趙充國擢為後將軍兼水衡都尉征匈奴還為後將

軍少府並本傳

王莽為右將軍衛尉百官表

右將軍典屬國常惠馮奉世

王尊轉守槐里兼行美陽令事並本傳

行官闕則卑者攝為之曰行

張湯韓安國並以御史大夫行丞相事本傳

平陽侯曹窋行御史大夫事高后本紀八年劉放曰按表及周昌傳高后四

年窋為御史大夫誅諸呂後免則非行也疑此紀誤

太僕臣賀行御史大夫事世家

行太常事太中大夫劉歆孝平王后傳

汾陽侯靳石為太常行太僕事功臣表下同

韓延年為太常行大行令事

行大鴻臚事少府樂成霍光傳

太子少傅臣安行宗正事世家

少府忠行廷尉事

王溫舒為右輔行中尉事

留侯張良行太子少傅事

黃霸廷尉行丞相長史事

蓋寬饒遷諫大夫行郎中戶將事

王尊守京輔都尉行京兆尹事

劉德宗正行京兆尹事

翟義南陽都尉行太守事

王尊轉守槐里兼行美陽令事並本傳

守如淳曰諸官初加皆試守一歲遷為真食全奉

朱雲以六百石秩試守御史大夫

本傳

光祿大夫劉辟彊守長樂衛尉

楚元王傳

守少府蕭望之

蕭望之傳

蕭育泰山太守入守大鴻臚

同上

執金吾任宏守大鴻臚

哀紀

御史臣光守尚書令

三王世家

趙廣漢京輔都尉守京兆尹

龔勝光祿大夫守右扶風

王訢為右輔都尉守右扶風武帝出駐車拜訢為真

薛宣入守左馮翊滿歲稱職為真

朱博以高第入守左馮翊滿歲為真本傳

守丞相長史邊通

張湯傳

守軍正丞胡建

守廷尉史路溫舒

張敞守太原太守

王尊守京輔都尉

並本傳

茂陵守令尹公

原涉傳

華陰守丞嘉

朱雲傳

假攝也

漢二年拜曹參為假左丞相入屯兵關中

本傳

假稻田使者燕倉昭紀

趙充國以假司馬從貳師將軍本傳

軍候假丞杜勳陳湯傳

宿衛

漢二年六月漢王還櫟陽令諸侯子在關中者皆集

櫟陽為衛高紀

高帝崩陳平畏讒固請之得宿衛陳平傳

高后二年齊哀王遣弟章入宿衛於漢封朱虛侯四

年封章弟興居為東牟侯皆宿衛長安史記齊悼惠王世家

文帝入未央宮有謁者十人持戟衛端門周勃傳

武帝時董仲舒對策曰使諸列侯郡守二千石各擇

其吏民之賢者歲貢各二人以給宿衛本傳

終軍曰得列宿衛食祿五年本傳

王臧上書宿衛累遷一歲至郎中令申公傳

張安世輔政宿衛十有三年封為富平侯張湯傳

昭帝時燕王旦上書願歸符璽入宿衛本傳

宣帝地節二年詔曰博陸侯宿衛武帝三十餘年宣紀

陽城侯劉德親親行謹厚以德得官宿衛者二十餘

年楚元王傳

魏相奏張安世子延壽重厚可以為光祿勳領宿衛

臣張湯傳

楊暉與孫會宗書曰幸賴先人餘業得備宿衛本傳

馮參為黃門郎給事中宿衛十餘年本傳

孔光為帝太傅位四輔給事中領宿衛本傳

成帝詔曰車騎將軍王音宿衛忠正勤勞王家元后傳

元后益封孔光詔曰博山侯光宿衛四世世為傅相

光祿勳豐宿衛三世奉車都尉甄邯宿衛勤勞建議

定策王莽傳

待詔

尚方待詔郊祀志

待詔金馬門公孫宏劉向馮商張子儵華龍柳褒

待詔公車東方朔朱買臣谷永

待詔承明之庭揚雄

待詔殿中韓生以易召待詔殿中

待詔五柞宮執金吾廣意

待詔丞相府劉德

待詔宦者署東方朔蘇武劉歆翼奉

待詔黃門李尋梁邱賀

武帝詔求能為韓詩者召蔡義待詔蔡義傳

伍宏以醫待詔董賢傳

吾邱壽王以善格五待詔本傳

宣帝詔見王褒以為待詔何武傳

魏相奏言知音善鼓琴者趙定龔德皆召見待詔王褒傳

本草待詔郊祀志

成帝時言祭祀方術者皆得待詔郊祀志

上計

孝武元封五年三月至泰山增封因朝諸侯王列侯

受郡國計本紀師古曰若今之諸州計帳也

太初元年春受計於甘泉本紀下同

天漢三年三月行幸泰山修封祀明堂因受計

太始四年三月行幸泰山因受計

孝宣黃龍元年詔曰上計簿具文而已務為欺謾以

避其課御史察計簿非實者按之使真偽毋相亂本紀

徐天麟謹按通典云漢制郡守歲盡遣上計掾史各一人條上郡內眾事謂之計簿

嚴助願奉三年計最本傳如淳曰舊法當使丞奉計今躬自願入奉也

京房為魏郡太守自請歲竟乘傳奏事天子許焉本傳

張蒼為計相一月更以列侯為主計四歲蕭何為相

國令蒼以列侯居相府領郡國上計者本傳

司隸校尉奏丞相衡位三公領計簿而專地盜土匡衡

傳

郝賢坐爲上谷太守入戍卒財物計謾免功臣表

西漢會要卷三十六

西漢會要卷三十七

宋 徐 天 麟 撰

職官七

秩祿

萬石穀月三百五十斛

太師 太傅 太保

丞相 太尉 御史大夫

前後左右將軍並百官表下同

中二千石師古日中二千石實得二千石也中之言滿也月得百八十斛是爲一歲凡得二千石者舉成數耳

西漢會要卷三十七

太常

光祿勳

衛尉

太僕

廷尉

大鴻臚

宗正

大司農

少府

執金吾

真二千石

徐天麟謹按外戚傳俗華秩視真二千石在中二千石之下二千石之上師古曰真

二千石月得百五十斛一歲凡得千八百石又按

如淳注汲黯傳亦云諸侯相秩真二千石月得百

二千石

師古曰穀月百二十斛一歲凡得一千四百四十石

太子太傅

荀悅漢紀自太子太傅至扶風比二千石

太子少傅

詹事

茂陵書秩真二千石

將作少府

大長秋

長樂少府

建平四年四月太后各長信少府置少府皆中二千石

典屬國

水衡都尉

京兆尹

左馮翊

右扶風

京輔都尉

左輔都尉

右輔都尉

司隸校尉荀悅漢紀校尉

並比二千石

城門校尉

中壘校尉

屯騎校尉

步兵校尉

越騎校尉

長水校尉

胡騎校尉

射聲校尉

虎賁校尉

諸侯相初金印吳楚反後改銀印初真二千石在郡守上

郡太守

增秩者為中二千石元帝建昭二年益三河大郡太守秩

長信中太僕

諸侯太傅

諸侯御史大夫

諸侯中尉哀帝日傳

相中尉皆
國二千石

中少府

左曹

右曹

大郡都尉

元帝紀

州牧

朱博傳秩真二千石

長陵令

呂后六年秩長陵令二千石

大內

史記孝景本紀

比二千石

穀月百斛

丞相司直

護軍都尉

光祿大夫

亡印綬增秩者

為中二千石

五官中郎將

左中郎將

右中郎將

虎賁中郎將

監羽林中郎將

西域都護

奉車都尉

駙馬都尉

騎都尉

郡都尉

千石

穀月九十斛

丞相長史

太司馬長史

御史中丞

將軍長史

太常丞

光祿丞

衛尉丞

六典注比千石

太僕丞

太鴻臚丞

宗正丞

太司農丞

少府丞

執金吾丞

廷尉正監

廷尉左監

廷尉右監

荀悅漢紀正監秩比千石

諸侯郎中令

諸侯僕

武帝損郎中令秩千石僕秩亦千石

萬戶縣令

比千石

穀月八十斛

太中大夫

郎中車將

郎中戶將

郎中騎將

謁者僕射

期門僕射

八百石 成帝陽朔二年除吏八百石
秩李奇曰除八百就六百

比八百石

諫大夫

六百石 穀月七
十斛

將作少府丞 詹事丞 水衡都尉丞

廷尉左平 廷尉右平 京兆丞

左馮翊丞 右扶風丞 京輔都尉丞

左輔都尉丞 右輔都尉丞 郡長史

州刺史 郡太守丞 郡都尉丞

萬戶縣令 朔方刺史 太子門大夫

太子庶子 太常掌故 龜鏡 武騎常侍 司馬 如傳

公車司馬令 大廐令 未央令

家馬令 車府令 路輪令

騎馬令 駿馬令 式道左候

式道右候 式道中候 廩犧令

外史 紀平 閭師 紀平

比六百石 穀月六
十斛

博士 議郎 左中郎

右中郎 五官中郎 戊己校尉

太子洗馬 謁者

五百石 成帝陽朔二年除吏五百石秩李奇日除五百就四百

縣長

四百石 穀月五

縣丞

縣尉

比四百石 穀月四

五官侍郎

左侍郎

右侍郎

三百石 穀月四

次縣長

比三百石 穀月三

五官郎中

左郎中

右郎中

二百石 穀月三

左馮翊卒史

黃霸傳 縣丞

縣尉

比二百石 穀月二

百石 穀月十

御史屬 史記匡衡傳

左右內史卒史

郡國五經卒史

大行卒史

以上儒林傳

長安游徼

長安獄吏

以上趙廣漢傳

比百石

斗食

百石以下有斗食之秩師古曰斗食者言一歲不滿百石日食一斗二升

佐史

漢官名師古曰斗食謂佐史也以上並百官表

增秩

汲黯以諸侯相秩居淮陽本傳

詔增符璽郎秩二等霍光傳

宣帝時二千石有治理効輒以璽書勉厲增秩賜金

循吏傳如淳曰太守雖號二千石有千石八百石居者功德茂異乃得滿秩

王成爲膠東相治甚有聲宣帝最先褒之下詔曰膠

東相成治有異等其賜成爵關內侯秩中二千石

潁川太守黃霸秩以八百石居以治行褒揚秩中二

千石

召信臣爲南陽太守爲百姓興利又爲河南太守治

行第一數增秩賜金以上並本傳

周堪召拜光祿大夫秩中二千石此類甚多舉一爲例

小黃令焦延壽舉最當遷三老官屬上書借留有詔

許增秩留京房傳

馮野王爲大鴻臚王舅不宜備九卿以秩出爲上郡

太守馮奉世傳

班伯遷水衡都尉秩中二千石叙傳

蕭咸爲宏農河東太守所居有政迹數增秩賜金

蕭由遷江夏太守平江賊成重等有功增秩並蕭望之傳

陳立爲巴郡太守秩中二千石居西南夷傳

元始元年賜吏在位二百石以上一切滿秩如真平紀

益吏祿

孝惠卽位詔曰吏所以治民也能盡其治則民賴之故重其祿所以爲民也

孝宣神爵三年詔曰吏不廉平則治道衰今小吏皆

勤事而奉祿薄欲其毋侵漁百姓難矣其益吏百石

以下奉十五

韋昭曰若食一斛則益五斗

孝成綏和元年益大司馬大司空奉如丞相

以上並本紀

班序

太師位在太傅上太保次太傅太傅位在三公上

百官表

武帝以衛青爲大將軍位在公上

通志職官畧

漢興置大將軍驃騎位次丞相

蔡質漢儀

舊列侯奉朝請者位次三公

後漢百官志

元壽二年賜大司馬位在司徒上

御史大夫位上卿

前後左右將軍位上卿

詹事位在長秋上

中太僕位在正卿太僕上

給事中位次中常侍中

以上並百官表

故事司隸校尉位在司直下其有所會居二千石前

翟方進傳

諸侯羣臣朝十月儀先平明謁者治禮引以次入殿門傳曰趨殿下郎中俠陛陞數百人功臣列侯諸將軍軍吏以次陳西方東鄉文官丞相以下陳東方西鄉大行設九賓臚句傳於是皇帝輦出房引諸侯王以下至吏六百石以次奉賀叔孫通傳

諸侯王

相國

太師

太傅

太保

丞相

大司馬

御史大夫

大將軍

列將軍兼官

特進

列將軍

列侯奉朝請

太常

光祿勳

衛尉

太僕

廷尉

宗正

大司農

大鴻臚

少府

長信少府

中少府

執金吾

太子太傅

水衡都尉

京兆尹

左馮翊

右扶風

典屬國

將作少府

就國侯

潁川三河太守

齊楚等相

東海等太守

高密等侯

太子少傅

太子詹事

關內侯

丞相司直

與州郡敘則居刺史守相上

司隸校尉

與州郡敘則居刺史守相上

城門校尉

八校尉

驄粟都尉

光祿大夫

非中二千

石者敘在三輔都尉下

御史中丞

與刺史守相敘則居其上

丞相長史

三輔都尉

五官左右中郎

將

羽林中郎將

護軍都尉

奉車都尉

秩光祿大夫者在關內侯下

駙馬都尉

騎都尉

尚書令

西域都護

太中大夫

尚書僕射

尚書

諸侯太傅

十三州刺史

與守相敘則居其上

朔方刺史

郡都尉

關都尉

農都尉

屬國都尉

西域副校尉

郎中車將

郎中戶將

郎中騎將

諸侯中尉

諸侯內史

諫大夫

太子家令

博士

九卿列卿丞

謁者僕射

公車司馬令

將軍長史

廷尉正監

長安令

千石令

黃門侍郎

尚書丞郎

議郎

五官左右中郎

從事中郎

太史令

廷尉平

三輔丞

六百石令

五百石長

郡司馬長史

五官左右侍郎

太守丞

都尉丞

三百石長

侍御史

太子門大夫

五官左右郎中

太子庶子

中庶子

太子舍人

太子洗馬

羽林郎

以上百官表

蠻夷叙位

孝宣甘露二年匈奴呼韓邪單于款五原塞願奉國
珍朝三年正月詔公卿議其儀丞相霸御史大夫定
國議曰聖王之制施德行禮先京師而後諸夏先諸
夏而後夷狄詩云率禮不越遂視既發相土烈烈海
外有截陛下聖德充塞天地光被四表匈奴單于鄉

風慕義舉國同心奉珍朝賀自古未之有也單于非
正朔所加王者所客也禮儀宜如諸侯王稱臣昧死
再拜位次諸侯王下太子太傅蕭望之以為單于非
正朔所加故稱敵國宜待以不臣之禮位在諸侯王
上外夷稽首稱藩中國遜而不臣此則羈縻之誼謙
亨之福也書曰戎狄荒服言其來服荒忽亡常如使
匈奴後嗣卒有烏竄鼠伏闕于朝享不為畔臣信讓
行乎蠻貉福祚流於無窮萬世之長策也天子采之
下詔曰蓋聞五帝三王教化所不施不及以政今匈
奴單于稱北藩朝正朔朕之不逮德不能宏覆其以

客禮待之令單于位在諸侯王上贊謁稱而不名宣紀
及蕭望之傳

西漢會要卷三十七

西漢會要卷三十八

宋 徐 天 麟 撰

職官八

使外國

孝武建元中月氏怨匈奴漢乃募能使者張騫以郎

應募使月氏張騫傳

元封五年詔令州郡察吏民有茂材異等可使絕國

者本紀

天漢元年遣蘇武以中郎將使持節送匈奴使畱在漢者武與副中郎將張勝及假吏募士斥候百餘人

俱蘇武傳

叩荏願為內臣妾孝武乃拜司馬相如為中郎將建節往使副使者王然于壺充國呂越人馳四乘之傳以賂西南夷至蜀太守以下郊迎縣令負弩矢先驅司馬相如傳

天子聞張騫之言欲從蜀求大夏道乃令因蜀健為發閒使數道並出出駝出荏出徙音斯叩出焚張騫傳師古曰

閒使者求閒隙而行又蒯通傳注閒使謂使人伺閒隙而單行

孝昭始元六年移中監蘇武前使匈奴留十九歲乃

還奉使全節以武為典屬國本紀

宣帝時光祿大夫義渠安國使行諸羌趙充國傳

元康元年上令羣臣舉可使西域者前將軍韓增舉

上黨馮奉世以衛侯使持節送大宛諸國客馮奉世傳

元帝初元五年衛司馬谷吉使匈奴不還本紀

建昭三年使護西域騎都尉甘延壽副校尉陳湯矯

發戊己校尉屯田吏士及西域胡兵攻郅支單于斬

其首傳詣京師本紀

蕭育遷謁者使匈奴副校尉師古曰時令校尉為使於匈奴而育為之副故

授副校尉後復為中郎將使匈奴蕭咸為中郎將使匈奴

蕭由遷謁者使匈奴副校尉蕭望之傳

金參使匈奴中郎將金日碑傳

行水災流民

孝武元狩三年遣謁者勸有水災郡種宿麥舉吏民能假貸貧民者以名聞

元鼎二年九月詔方今水潦移於江南方下巴蜀之粟致之江陵遣博士中等分循行諭告所抵毋令重

困吏民有賑救飢民免其厄者具舉以聞並本紀

元鼎中博士徐偃使行風俗偃矯制使膠東魯國鼓鑄鹽鐵終軍奏偃矯制顛行非奉使體終軍傳

孝昭始元二年三月遣使者賑貸貧民毋種食者

孝宣本始四年正月詔曰今歲不登已遣使者賑貸困乏

孝成建始三年九月詔乃者郡國被水災流殺人民遣諫大夫林等循行天下

河平四年三月遣光祿大夫博士嘉等十一人行舉瀕河之郡水所毀傷困乏不能自存者發財賑貸避

水它郡國所在冗食之舉惇厚有行能直言之士並本紀

平當行流民幽州奉使者十一人為最本傳

陽朔二年秋關東大水流民欲入關者勿苛留遣諫

西漢書要卷三十一
大夫博士分行視九月奉使者不稱

鴻嘉四年正月詔水旱爲災關東流冗者衆已遣使者循行郡國被災害什四以上民貲不滿三萬勿出租賦逋貸未入皆勿收流民欲入關輒籍內

孝哀初卽位詔乃者河南潁川郡水出流殺人民壞廬舍已遣光祿大夫循行舉籍賜死者棺錢人三千

並本紀

舉賢觀風

孝武元狩六年遣博士大等六人分循行天下存問鰥寡廢疾亡以自振業者貸與之諭三老孝弟以爲

民師舉獨行之君子召詣行在所士有特招使者之任也詳問隱處亡位及寃失職姦猾爲害野荒治苛者舉奏郡國有所爲便者上丞相御史以聞

孝昭始元元年遣故廷尉王平等五人持節行郡國舉賢良問民所疾苦寃失職者

孝宣元康四年遣太中大夫彊等十二人循行天下存問鰥寡覽觀風俗察吏治得失舉茂材異倫之士本始元年遣使者持節詔郡國二千石謹牧養民而風德化

孝元初元元年詔方田作時朕憂蒸庶之失業臨遣

光祿大夫褒等十二人循行天下存問耆老鰥寡孤獨困乏失職之民延登賢俊招顯側陋因覽風俗之化

建昭四年臨遣諫大夫博士賞等二十一人循行天下存問耆老鰥寡孤獨乏困失職之人舉茂材特立之士

孝成永始三年正月日有蝕之詔臨遣太中大夫嘉等循行天下存問耆老民所疾苦其與部刺史舉惇樸謙遜有行義者各一人

孝平元始四年遣太僕王惲等八人又置副假節分行天下覽觀風俗以上並本紀

舉冤獄

治獄使者內謁者令郭穰宣紀

孝宣五鳳四年四月日有蝕之詔以前使使者問民所疾苦復遣丞相御史掾二十四人循行天下舉冤獄察擅為苛禁深刻不改者本紀

孝成鴻嘉元年詔曰方生長時臨遣諫大夫理等舉三輔三河宏農冤獄本紀

成帝初卽位孔光為博士數使錄冤獄行風俗賑贍流民奉使稱旨本傳

雜遣使

吳楚反以爰盎為太常奉宗廟使吳王吳王弟子德

侯為宗正輔親戚使吳王
傳

宣帝時蔡癸以好農使勸郡國至大官食貨
志

稻田使者燕倉昭
紀

地節中光祿大夫郭昌使行河溝洫
志

李尋以騎都尉使護河隄李尋
傳

成帝時河決館陶河隄使者王延世使塞溝洫志
下同

鴻嘉四年河隄都尉許商與丞相史孫禁行視圖方

略馮野王以故二千石使行河隄馮野
王傳

平當以經明禹貢使行河為騎都尉領河隄平當

河平三年謁者陳農使使求遺書於天下

孝平元始元年遣諫大夫行三輔舉籍吏民以元壽

二年倉卒時橫賦斂者償其直

元始二年使謁者大司馬掾四十四人持節行邊兵

元始二年郡國大旱蝗遣使者捕蝗並本
紀

奉使矯制上

武帝即位汲黯為謁者東粵相攻上使黯往視之至

吳而還報曰粵人相攻固其俗不足以辱天子使者

河內失火燒千餘家上使黯往視之還報曰家人失

西漢會要卷三十一
火屋比延燒不足憂臣過河內貧人傷水旱萬餘家
或父子相食臣謹以便宜持節發河內倉粟以賑貧
民請歸節伏矯制本傳上賢而釋之

元鼎中博士徐偃使行風俗偃矯制使膠東魯國鼓
鑄鹽鐵還奏事徙爲太常丞御史大夫張湯劾偃矯
制大害法至死偃以爲春秋之義大夫出疆有可以
安社稷存萬民顓之可也湯以致其法不能誦其義
有詔下終軍問狀軍詰偃曰古者諸侯國異俗分百
里不通時有聘會之事安危之勢呼吸成變故有不
受辭造命顓已之宜今天下爲一萬里同風故春秋

王者無外偃巡封域之中稱以出疆何也且鹽鐵郡
有餘藏正二國廢國家不足以爲利害而以安社稷
存萬民爲辭何也又詰偃膠東南近琅邪北接北海
魯國西枕泰山東有東海受其鹽鐵偃度四郡口數
田地率其用器食鹽不足以并給二郡邪將執宜有
餘而吏不能也何以言之偃矯制而鼓鑄者欲及春
耕種贍民器也今魯國之鼓當先具其備至秋乃能
舉火此言與實反者非偃已前三奏無詔不惟所爲
不許而直矯作威福以從民望干名采譽此明聖所
必加誅也枉尺直尋孟子稱其不可今所犯罪重所

就者小僂自予必死而爲之邪將幸誅不加欲以采名也僂窮詘服罪當死軍奏僂矯制顛行非奉使體請下御史徵僂卽罪奏可上善其詰有詔示御史大

夫終軍傳

浩侯王恢坐使酒泉矯制害當死贖罪免

功臣表

宣帝元康元年上令羣臣舉可使西域者前將軍韓增舉上黨馮奉世以衛侯使持節送大宛諸國客至伊修城會故莎車王弟呼屠徵與旁國共殺其王萬年及漢使者奚充國自立爲王時匈奴又發兵攻車師城不能下而去莎車遣使揚言北道諸國已屬匈奴矣於是攻劫南道與歃盟畔漢從鄯善以西皆絕不通都護鄭吉校尉司馬意皆在北道諸國間奉世

與其副嚴昌計以爲不亟擊之則莎車日彊其勢難制必危西域遂以節諭告諸國王因發其兵南北道合萬五千人進擊莎車攻拔其城莎車王自殺傳其首詣長安更立它昆弟子爲莎車王諸國悉平威振西域奉世乃罷兵以聞帝召見韓增曰賀將軍所舉得其人奉世遂西至大宛大宛聞其斬莎車王敬之異于它使得其名馬象龍而還上甚說議封奉世丞相將軍皆以爲可獨少府蕭望之以爲奉世奉使有

西漢會要卷三十八
指而擅矯制違命發諸國兵雖有功效不可以爲後
法卽封奉世開後奉使者利以奉世爲比爭逐發兵
要功萬里之外爲國家生事于夷狄漸不可長奉世
不宜受封上善望之議以奉世爲光祿大夫馮奉世及西域
傳

西漢會要卷三十八

西漢會要卷三十九

宋 徐 天 麟 撰

職官九

奉使矯制下

元帝建昭三年使西域都護騎都尉甘延壽副校尉
陳湯共誅斬匈奴郅支單于於康居始郅支單于困
辱使者上書驕嫚湯爲人沈勇有大慮多策謀喜奇
功每過城邑山川常登望旣領外國與延壽謀曰夷
狄畏服大種其天性也西域本屬匈奴今郅支單于
威名遠聞侵陵烏孫大宛常爲康居畫計欲降服之

如得此二國北擊伊列西取安息南排月氏山離烏
弋數年之間城郭諸國危矣且其人剽悍好戰伐數
取勝久蓄之必爲西域患郅支單于雖所在絕遠蠻
夷無金城強弩之守如發屯田吏士毆從烏孫衆兵
直指其城下彼亡則無所之守則不足自保千載之
功可一朝而成也延壽亦以爲然欲奏請之湯曰國
家與公卿議大策非凡所見事必不從延壽猶與不
聽會其久病湯獨矯制發城郭諸國兵車師戊己校
尉屯田吏士延壽聞之驚起欲止焉湯怒按劔叱延
壽曰大衆已集會豎子欲沮衆邪延壽遂從之部勒
行陳益置揚威白虎令騎之校漢兵胡兵合四萬餘
人廷壽湯上疏自劾奏矯制陳言兵狀遂斬單于首
旣至論功石顯匡衡以爲延壽湯擅興師矯制幸得
不誅如復加爵土則後奉使者爭欲乘危徼幸生事
於蠻夷爲國招難漸不可開元帝內嘉延壽湯功而
重違衡顯之議議久不決故宗正劉向上疏曰郅支
單于囚殺使者吏士以百數事暴揚外國傷威毀重
羣臣皆聞焉陛下赫然欲誅之意未嘗有忘西域都
護延壽副校尉湯承聖指倚神靈總百蠻之君檻城
郭之兵出百死人絕域遂蹈康居屠五重城蹇欵侯

西漢書卷三十一
之旗斬郅支之首懸旌萬里之外揚威昆山之西掃
谷吉之恥立昭明之功萬夷懼伏莫不懼震呼韓邪
單于見郅支已誅且喜且懼鄉風馳義稽首來賓願
守北藩累世稱臣立千載之功建萬世之安羣臣之
勲莫大焉昔周大夫方叔吉甫爲宣王誅獫狁而百
蠻從其詩曰嘽嘽焯焯如霆如雷顯允方叔征伐獫
狁蠻荆來威易曰有嘉折首獲匪其醜言美誅首惡
之人而諸不順者皆來從也今延壽湯所誅震雖易
之折首詩之雷霆不能及也論大功者不錄小過舉
大美者不疵細瑕司馬法曰軍賞不踰月欲民速得
爲善之利也蓋急武功重用人也吉甫之歸周厚賜
之其詩曰吉甫宴喜旣多受祉來歸自鎬我行永久
千里之鎬猶以爲遠况萬里之外其勤至矣延壽湯
旣未獲受祉之報反屈捐命之功久挫於刀筆之前
非所以勸有功勵戎士也昔齊桓前有尊周之功後
有滅項之罪君子以功覆過而爲之諱行事貳師將
軍李廣利捐五萬之師糜億萬之費經四年之勞僅
獲駿馬三十匹雖斬宛王母鼓之首猶不足以復費
其私罪惡甚多孝武以爲萬里征伐不錄其過遂封
拜兩侯三卿二千石百有餘人今康居國疆於大宛

郅支之號重于宛王殺使者罪甚於雷馬而延壽湯
不煩漢士不費斗糧比於貳師功德百之且常惠隨
欲擊之烏孫鄭吉迎自來之日逐猶皆裂土受爵故
言威武勤勞則大於方叔吉甫列功覆過則優於齊
桓貳師近事之功則高於安遠長羅而大功未著小
惡數布臣竊痛之宜以時解縣通籍除過勿治尊寵
爵位以勸有功於是天子下詔曰匈奴郅支單于背
畔禮義留殺漢使者吏士甚逆道理朕豈忘之哉所
以優游而不征者重動師衆勞將率故隱忍而未有
云也今延壽湯睹便宜乘時利結城郭諸國擅興師
矯制而征之賴天地宗廟之靈誅討郅支單于斬獲
其首及闕氏貴人名王以下千數雖踰義于法內不
煩一夫之役不開府庫之藏因敵之糧以贍軍用立
功萬里之外威震百蠻名顯四海爲國除殘兵革之
原息邊竟得以安然猶不免死亡之患罪當在於奉
憲朕甚閔之其赦延壽湯罪勿治詔公卿議封焉議
者以爲宜如軍法捕斬單于令匡衡召顯以爲郅支
本亡逃失國竊號絕域非真單于元帝取安遠侯鄭
吉故事封千戶衡顯復爭乃封延壽爲義成侯賜湯
爵關內侯食邑各三百戶加賜黃金百斤告上帝宗

廟大赦天下拜延壽為長水校尉湯為射聲校尉陳湯傳

矯節 偽節 附

周勃欲入北軍襄平侯紀通尚符節乃令持節矯內

勃北軍呂后紀

少帝令謁者持節勞劉章章欲奪節謁者不肯章乃

與載因節信馳斬長樂衛尉呂更始還入北軍同上

汲黯以便宜持節發河內倉粟以振貧民請歸節伏

矯制罪上賢而釋之本傳

戾太子使舍人無且持節入未央宮戾太子傳

征和二年衛太子擅發兵盧賀坐受太子節掠死臣功表

太子召監北軍使者任安發北軍兵安受節已閉軍門不肯應太子太子敗安坐受太子節懷二心腰斬

劉屈氂傳

考課

公卿課羣吏

宣帝始親政事自丞相以下各奉職奏事以傳奏其言考試功能侍中尚書功勞當遷及有異善厚

加賞賜本紀

丙吉曰歲竟丞相課其殿最奏行賞罰

丙吉傳

地節四年詔令郡國歲上繫囚臣掠笞若瘐死者

所坐名縣爵里丞相御史課殿最以聞

本紀

黃龍元年詔曰上計簿具文而已務為欺謾以避

其課三公不以為意朕將何任御史察計簿疑非

實者按之使真偽毋相亂

本紀

孝元使尚書選第中二千石而大鴻臚馮野王行

能第一

本傳

陳咸為御史中丞總領州郡奏事課第諸刺史

陳萬

年傳

班况為上河農都尉大司農奏課連最

本紀

谷永薦薛宣疏曰宣考績功課簡在兩府不敢過

稱

薛宣傳

光祿第郎從官

孝元永光元年詔丞相御史舉質樸敦厚遜讓有

行者光祿歲以此科第郎從官

本紀

光祿勳舉何武四行

本傳

博士選三科

成帝時博士選三科高第為尚書次為刺史其不

通政事以久次補諸侯大傅

孔光傳

孔光以高第為尚書同上

州課郡

河南守吳公治平為天下第一徵以為廷尉賈誼傳

兒寬為左內史有軍發以負租課殿當免民恐失

之輸租不絕課更以最本傳

刺史以六條問事百官公卿表注

故事選郡國守相高第為中二千石朱博傳

宣帝厲精為治二千石有治理効輒以璽書勉厲

公卿缺則選諸所表以次用之循吏傳

宣帝以賢良高第揚州刺史黃霸為潁川太守秩

比二千石居官戶口歲增治為天下第一召守京

兆尹秩二千石坐發民治馳道不先以聞又發騎

士詣北軍馬不適士効乏軍興連貶秩有詔歸潁

川太守官以八百石居郡中愈治下詔稱揚賜爵

關內侯黃金百斤秩中二千石黃霸傳

朱邑為北海太守以治行第一入為大司農朱邑傳

尹翁歸為扶風盜賊課常為三輔最尹翁歸傳

韓延壽為東郡太守斷獄大減為天下最韓延壽傳

河南太守召信臣治行常為第一荊州刺史奏信

臣為百姓與利賜黃金四十斤召信臣傳

何武為清河太守坐郡中被災害什四免何武傳

天水太守陳立勸民農桑為天下最西南夷傳

陳萬年廣陵太守高第入為右扶風陳萬年傳

鄭昌遷淮陽相以高第入為右扶風鄭宏傳

郡課縣

秋冬課吏尹翁歸傳

卜式為成臯令將漕最拜齊太傅卜式傳

義縱補上黨郡中令縣無逋事舉第一遷為長陵

及長安令義縱傳

趙廣漢為翟陽令以治行尤異遷京輔都尉趙廣漢傳

張敞拜膠東相上名尚書調補縣令者數十人張敞傳

尹賞以三輔高第選守長安令尹賞傳

何顯家有市籍租常不入縣數負其課何武傳

焦延壽為小黃令以候司先知姦邪盜賊不得發

舉最當遷京房傳

朱博櫟陽令徙雲陽平陵三縣以高第入為長安

令朱博傳

蕭育為茂陵令會課育第六而漆令郭舜殿見責問育為之請扶風怒曰君課第六裁自脫何暇欲

為左右言及罷出傳召茂陵令詣後曹當以職事

對蕭育傳

功次

周仁為太子舍人積功遷至太中大夫周仁傳

衛綰為郎功次遷中郎將衛綰傳

石奮積功勞孝文時官至太中大夫石奮傳

趙禹以刀筆吏積勞為御史趙禹傳

兒寬為掌故功次補廷尉文學卒史兒寬傳

田廣明以郎為天水司馬功次遷河南都尉田廣明傳

王訢以郡縣吏積功稍遷被陽令王訢傳

馮奉世為郎昭帝時以功次補武安長馮奉世傳

馮野王為太子中庶子以功次補當陽長馮野王傳

馮遂為美陽令功次遷長樂屯衛司馬馮遂傳

馮譚以孝廉為郎功次補天水司馬馮譚傳

薛恭本郡孝者功次稍遷薛宣傳

平當少為大行治禮丞功次補大鴻臚文學平當傳

元帝數召見京房對曰古帝王以功舉賢則萬化成

瑞應著末世以毀譽取人故功業廢而致災異宜令

百官各試其功災異可息詔使房作其事房奏考功

課吏法上令公卿朝臣與房會議温室皆以房言煩

碎令上下相司不可許上意鄉之時部刺史奏事京
師上召見諸刺史令房曉以課事刺史復以爲不可
行唯御史大夫鄭宏光祿大夫周堪初言不可後善
之上令房上弟子曉知考功課吏事者欲試用之房
上中郎任良姚平願以爲刺史試考功法臣得通籍
殿中爲奏事以防壅塞石顯五鹿充宗皆疾房欲遠
之建言宜試以房爲郡守元帝於是以房爲魏郡太
守秩八百石居得以考功法治郡房自請願無屬刺
史得除用它郡人自第吏千石以下歲竟乘傳奏事
天子許焉房自知數以論議爲大臣所非內與石顯
五鹿充宗有隙不欲遠離左右及爲太守憂懼以建
昭二年二月朔拜上封事曰辛酉己來蒙氣衰去太
陽精明臣獨欣然以爲陛下有所定也然少陰倍力
而乘消息臣疑陛下雖行此道猶不得如意臣竊悼
懼守陽平侯鳳欲見未得至己卯臣拜爲太守此言
上雖明下猶勝之效也臣出之後恐必爲用事所蔽
身死而功不成故願歲盡乘傳奏事蒙哀見許乃幸
己蒙氣復乘卦太陽侵色此上大夫覆陽而上意疑
也已卯庚辰之間必有欲隔絕臣令不得乘傳奏事
者房未發上令陽平侯鳳承制詔房止無乘傳奏事

房意愈恐去至新豐因郵上封事房去月餘竟下獄

京房傳

官稱

大府

杜周傳師古曰大府丞相御史之府也張湯傳又注云大府丞相府也二說不同

二府

劉向傳如淳曰二府丞相御史也

兩府

杜周傳如淳曰丞相御史府也

四府

趙充國傳四府舉辛武賢小第湯

五府

趙充國傳五府復舉辛湯段會宗傳五府舉會宗

從官

元紀令從官給事宮司馬中者師古曰從官親近天子常侍從者皆是也

中都官

百官表司隸校尉侍御從中都官師古曰中都官京師諸官府也

中朝

劉輔傳孟康曰中朝內朝也大司馬左右前後六百石為

外朝

也終軍傳師古曰謂非侍衛之臣

外官

諸侯王表作左官之律應邵曰入道上

左官

右今舍天子而仕諸侯故謂之左官也

郡將

嚴延年傳延年新將師古曰謂郡守為郡將者以其兼領武事也

主郡吏

鼂錯傳師古曰郡守也

府官

貢禹傳師古曰謂太守之府

西漢會要卷三十九

西漢會要卷三十九

Blank columns for text in a traditional Chinese woodblock print format.

